

TRANSMISION DI PROGRAMA "CONSENSHI" TA MOCION DI DESCONFianza CONTRA GERENCIA DI TELE ARUBA

ORANJESTAD(AAN) E hecho cu gerencia di Tele Aruba a haya nan mes ta pasa e programa Consenshi tog diabierna ultimo despues cu nan mes a tuma e decision dictatorial y completamente anti democratico pa bay censura e programa basa riba argumentonan ridiculo y peligroso, a pone cu nan a haya un mocion di desconfianza contra nan mesun maneho desastroso.

Si e gerencia di Tele Aruba a hiba un bon maneho y tabata tuma decisionnan firme y bon planea, nan no mester a pasa den e berguensa grandi cu despues cu nan mes a para un programa cu segun nan opinion (y aparentemente nan opinion ta bay na prome lugar cu interes general den pueblo) tabata contene difamacion contra cierto hendenan (ministranan den gobierno) cu e programa ey mester a worde pasa tog.

Un homber para firme den su sapato lo a bisa gobierno cu e ta para riba cu e programa no por worde pasa despues cu e mes a tuma e decision cu pa e, segun ley, e programa no tabata apto pa ser pasa y cu si gobierno para riba cu e programa mester worde pasa tog, cu gerencia lo distancia su mes di e decision di gobierno o tene e honor na nan mes y tuma nan retiro di inmediato.

Cu e transmision di e programa Consenshi gerencia di Tele Aruba a ser poni como payasonan cu a tuma decisionnan descabeya y cu gobierno mester a hala nan atencion pa e barbaridad cu nan a comete.

Ki paso gobierno ta bay tuma contra e decision tuma di parti di gerencia di Tele Aruba pasobra cu transmision di e programa Consenshi den cual Zaandam a basha abao contra gobierno, gobierno tambe ta admiti publicamente cu gerencia di Tele Aruba a mete cu derechonan democratico di pueblo di Aruba y esaki mester tin su consecuencianan: awe ta programa Consenshi kico lo bay tin mayan?

Gerencia di Tele Aruba a core saca copia di un artikkel di ley pa manda pa prensa en general na Aruba pa trata na hustifica nan decision, pero e supuesto difamacion o acusacionnan sin base cu ger-

encia di Tele Aruba a considero como argumento pisa pa no transmiti e programa Consenshi a ser pasa tog diabierna anochi.

Ta di unda a sali cu gerencia di Tele Aruba por bay dicta cu loke Zaandam a haci ta difamacion y despues e programa ta ser pasa tog y cual acto ta pone cu Zaandam na su turno por bisa cu ta gerencia di Tele Aruba ta acusa Zaandam falsamente di algo cu gerencia di Tele Aruba mester prueba ainda, pero gerencia di Tele Aruba si por haci loke nan ta haya ta bon?

Loke gerencia di Tele Aruba a haci pa prohibi transmision di e programa "Consenshi" tabata un acto estilo Mediaraad cu no ta existi na Aruba y asina gerencia di Tele Aruba a bay sinta riba stoel di hues lubidando cu ningun hues den Reino Hulandes lo tribi di hinca e locura den nan cabez pa bay mete cu constitucion den Reino Hulandes cu ta garantiza libertad di expresion y libertad di prensa.

Si actuacion di gerencia di Tele Aruba no ta ser mira door di gobierno di Aruba como un violacion flagrante di constitucion di pais Aruba anto mucho cos positivo pueblo no por spera di e maneho actual cu ta worde hiba den Tele Aruba.

Siman pasa e tal Van der Vaart a bay bisa na radio cu e gran parti di empleadonan di Tele Aruba ta para tras di e maneho cu su persona hunto cu Van der Weide ta hiba den Tele Aruba y cu solamente un o dos empleado kizas no ta contento cu e maneho nobo; wel shon Van der Vaart splica pueblo pakico e trahadornan cu supuestamente ta para bo tras ta asina rabia cu na tin cu traha bao di un dak cu ta leak awa pa loco?

For di dia cu boso a drenta den Tele Aruba boso no por a laga drecha e dak?

Si no tin placa pa laga drecha e dak bo mester splica pueblo cu pa bo salario mionario si tin placa, pero e trahadornan cu supuestamente ta para bo tras, cu nan

si ta contento cu nan mester traha bao di dak cu ta leak.

Splica pueblo pakico trahadornan di Tele Aruba ta spanta cu e antena bieu di un minuut pa otro por cay riba na cabez den Tele Aruba y matahente pasobra ainda boso maneho nobo no por a percura pa kita e peliger ey for di caminda.

Splica pueblo pakico te awe e camaranan cu a ser manda pa drecha na Merca keto bay no ta bek na Aruba?

Splica pueblo cu si bo ta bay mete cu constitucion di pais Aruba pa prohibi un programa di opinion pa despues bo haya bo mes ta pasa e programa tog cu ainda trahador-

nan di Tele Aruba ta para bo tras.

Ora cu bo bisa cu trahadornan di Tele Aruba ta para bo tras, bo ta trata di laga pueblo kere cu tur trahador den Tele Aruba, cu excepcion di un o dos, cu tur ta para tras di e decision tuma door di gerencia di Tele Aruba pa bay linea recta contra libertad di expresion y bay linea recta contra libertad di prensa y pa colmo door di un medio di comunicacion cu mester sa mihor y pa cual e trahadornan di Tele Aruba mes ta traha.

Unda sindicato FTA a keda pa saca cara di trahadornan di Tele Aruba?

National Car Rental
tin na benta tur su Tercelnan a/c airco 1995
Cavalier St. Wagon, Suzuki Samurai '95
Cavalier Sedan.

DEMOCRACIA BIBO!!

